

四庫全書

集部

欽定四庫全書

集部

會稽擬英總集卷二

詳校官中書<sub>臣</sub>張經田

助教<sub>臣</sub>常循履勛

總校官庶吉士<sub>臣</sub>倉聖脉

校對官中書<sub>臣</sub>田尹衡

謄錄監生<sub>臣</sub>黃廷璧

欽定四庫全書

集部八

會稽掇英總集

總集類

提要

臣等謹案會稽掇英總集二十卷宋孔延之  
撰原本自序首題其官為尚書司封郎中知  
越州軍州事浙東兵馬鈐轄末署熙寧壬子  
五月一日越州清思堂案施宿嘉泰會稽志  
延之於熙寧四年以度支郎官知越州五年

十一月召赴闕壬子正當熙寧五年其歲月  
與會稽志相合惟志稱延之為度支郎官而  
此作司封郎中集中有沈立等和蓬萊閣詩  
亦作孔司封集為延之手訂於官位不應有  
誤未知施宿何所據也延之此書以會稽山  
水人物著美前世而紀錄賦詠多所散佚因  
博加搜採旁及碑版石刻自漢迄宋凡得銘  
志歌詩等八百五篇輯為二十卷各有類目

前十五卷為詩首曰州宅次西園次賀監次山水分蘭亭等八子目次寺觀分雲門寺等四子目而以祠宇附之次送別次寄贈次感興次唱和後五卷為文首曰史辭次頌次碑銘次記次序次雜文書中於作者皆標姓名而獨稱王安石為史館王相蓋作此書時正安石柄政之際故有所避而不敢直書歟所錄詩文大都由搜岩剔藪而得之故多出名

人集本之外為世所罕見如大厯浙東唱和  
五十餘人今錄唐詩者或不能舉其姓氏實  
賴此以獲傳其於唐宋太守題名壁記皆全  
錄原文尤為具有卓識蓋逸記遺篇所來既  
遠以資考證裨益良多固不徒蒐訪之勤為  
可嘉尚已此書世鮮流傳藏書家多未著錄  
此則明山陰祁氏淡生堂抄存本也乾隆四  
十四年二月恭校上

總纂官臣紀昀臣陸錫熊臣孫士毅

總校官臣陸費墀

--	--	--	--	--	--	--	--



會稽掇英摭集原序

予常恨詩書之闕亡使善惡之戒不詳見於後代者蓋  
編脫簡落不能即補之故也後之為文章自非藏之名  
山副在絀帙鏤之板屋室有時而變勒之石岸谷有時  
而易況火于秦莽卓于漢割裂于六朝五代則木石之  
能不散蕩者幾矣若元微之白居易之吟咏撰述汪洋  
富博可謂才充力敵矣而今完缺不同者白能自為之  
集舉而置之二林之藏元則悠然不知所以為計也故

題之板不如刊之石刊之石不如墨諸紙苟欲誦前人  
之清芬搜斯文之放逸而傳之久遠者則紙本尚矣會  
稽稱名區自周官國語史記其衣冠文物紀錄賦咏之  
盛則自東晉而下風亭月榭僧藍道館一雲一鳥一草  
一木覲縷而曲盡者自唐迄今名卿碩才毫起櫛比碑  
銘頌志長歌短引究其所作宜以萬計而時移代變風  
磨雨剝見於今者蓋亦僅有考之壁記自唐武德至光  
啓為之守者幾百人其間高情逸思發為篇詠者豈無

四五而今所傳者元薛李孟數人而已或失於自著或  
怠於所承此予之所以深惜也故自到官申命吏卒徧  
走巖穴且攜之編蘊詢之好事自太史所載至熙寧以  
來其所謂銘志歌詠得八百五篇為二十卷命曰會稽  
掇英摠集詩則以古次律自近而之遠文則一始於古  
稍以歲月為先後無所異也噫隋珠和璞流落乎冥昧  
久矣一旦鉤索寶聚夸示來世神光靈氣炯然在目東  
南之美盡矣闕亡之恨消矣所以然者庶幾無負作者

之用心也時熙寧壬子五月一日孔延之序

欽定四庫全書

會稽掇英總集卷一

宋 孔延之 撰

州宅

州之城因種山之勢盤繞迴抱若卧龍形故取以為名而州之宅又居山之陽凡所謂樓閣臺榭之勝者皆因高為之以極登覽圖經云上有大夫種墓今失其處

輿地

志曰潮水穴山失其尸蓋子胥乘潮水取以去之今山西缺處是也

律詩

州宅

元稹

州城縈繞拂雲堆，鑑水稽山滿目來。  
四面無時不屏障，一家終日在樓臺。  
星河影向簷前落，鼓角聲從地底迴。  
我是玉皇香案吏，謫居猶得小蓬萊。

答微之誇州宅

白居易

賀上人迴得報書，大誇州宅似仙居。  
厭看馮翊風沙久，喜見蘭亭煙景初。  
日出旌旗生氣色，月明樓閣在空虛。

知君暗數江南郡除却餘杭盡不如

再酬復言和誇州宅

元稹

會稽天下本無儔任取蘇杭作輩流  
斷髮儀刑千古學奔濤翻動萬人憂  
石緣類鬼名羅刹寺為因墳號虎丘  
莫著詩章遠牽引由來北郡似南州

新樓

李紳

戎容罷引旌旗卷朱戶褰開雉堞高  
山聳翠微連郡閣地臨滄海接靈鼇  
坐疑許宅驅鷄犬笑類樊妻化羽毛

惆悵桂枝零落促莫思方朔種山桃

杜鵑樓

樓前植杜鵑  
因以為名

杜鵑如火千房坼丹檻低看晚景中繁豔向人啼宿露  
落英飄砌怨春風早梅昔待佳人折好月誰將老子同  
唯有此花隨越鳥一聲啼處滿山紅

滿桂樓

湖州城南臨眺於外盡見湖山別開  
水扉通杜鵑樓不啓重局清夜可以開

宴

為憐湖水通宵望不學樊揚却月樓  
唯待素規澄滿鏡



不看纖魄挂如鉤  
卷簾方影侵紅燭  
繞竹斜輝映碧流  
蕭颼曉風聞水落  
此時何異洞庭秋

海榴亭

海榴花早開  
繁榮光照晴霞破  
碧煙高近紫霄凝  
菡萏迥依江月伴  
嬋娟懷芳不作翻  
風豔列萼猶含泣  
露妍搖落舊叢雲  
水隔不堪行坐數  
流年

望海亭

烏兔免缺天涯迥  
鶴背松梢拂檻低  
湖鏡坐隅看匣滿

海濤生處辨雲齊  
夕嵐明滅江帆少  
煙樹蒼茫客思迷  
蕭索身心俱是夢  
九秋應共草萋萋

橘園

江城露斂經霜早  
園橘千株欲變金  
朱實摘時天路近  
素雲飄處海雲深  
誰同枳棘愁遷徙  
每抱馨香仰照臨  
憐爾結根能自保  
不隨寒暑換貞心

南亭竹

東南共美凌霜操  
五月凝陰入座寒  
煙惹翠梢含玉露

粉開春籜聳琅玕莫令戲馬兒童見試引為龍道士看  
知爾結根香實在鳳皇終擬下雲端

使院竹

莫見凌風飄粉籜須知礙石作盤根細看枝上蟬吟處  
猶是筍時蟲蝕痕月送綠陰斜上砌露含寒色濕遮門  
列仙終日逍遙地烏雀潛來不敢喧

寄會稽范希文

滕宗諒

江山千里接仁封都在東南秀氣中借問玉皇香案吏

蓬萊何似水精宮

州宅

并序

張伯玉

余嘗愛越中山水然未之遊慶厯初從事蘇臺時范吏部自丹陽徙會稽余贈以越州詩云何當獨把釣竿手笑擁一艘東去遊其時但欲放曠於漁樵間耳至和中出倅新定越守王工部新葺蓬萊閣成畫圖來乞詩余荅之云會須長揖浮丘伯醉聽銀河秋浪聲又欲為蓬萊客耳去年春久病省中因乞此郡聖恩得請懷二千

石來遂為主人矣昔元微之在越有州宅詩樂天和之  
余雖非其流然所居所得一也因暇日登覽輒賦一章  
書于屋壁仍以寄王范二詩追次焉聊且導主人之所  
適無得以寫吾疇昔之好云

萬疊湖山煙水濱朱門畫戟間松筠登臨不踏紅塵路  
燕寢長居紫府春晝靜欲驂風外駕夜寒疑是月中身  
我慙白首方懷紱猶得蓬萊作主人

元詩云我是玉皇  
香案吏謫居猶得

小蓬萊

贈范吏部

海天東下越王州，碧城繚繞環山丘。  
春晴紫翠堆綺屋，日暮煙雨藏朱樓。  
禹祠花底金穴峻，賀老門前銀漢秋。  
何當獨把釣竿手，笑擁一艘東去遊。

答王越州蓬萊閣

書報蓬萊高閣成，越山增翠越波明。  
雲收海上天地靜，人在月中金翠橫。  
游女弄芳珠作珮，仙人度曲玉為笙。  
會須長揖浮丘伯，醉聽銀河秋浪聲。

蓬萊閣醉歸

蓬萊閣上醉歸時，猶索芳樽步步隨。  
啼鳥似來留翠珮，旁人笑為整花枝。  
腰間半鞵黃金印，頭上斜歌白接離。  
拍手向他賓從道，使君未老莫扶持。

西樓晚望

疊岫斂餘霞，輕舸簇遠沙。  
斜陽媚城郭，細柳雜汀花。  
兩鰲歸騎蕭蕭起，暮鴉誰知故園興。  
閒在使君家。

逍遙堂寓興

疎竹間花陰了無塵土侵旌麾千騎長風月一堂深海  
氣生吟榻煙香披醉襟山翁方自得莫問去留心

小樓獨酌

老去春來事事慵春陰獨酌小樓中一千里色江南岸  
二十四般花信風祇有谿山迎醉目更無塵土倦樊籠  
鷓鴣自得誠堪笑詩有餘狂酒有功

清思堂畫坐

堂上蕭然畫戶開澹松疎竹蔭蒼苔白雲無事不肯去



幽鳥有時還自來何處覆車迷徑路幾人緩頰走塵埃  
支離得意誰知我自對庭花引一杯

西樓早望

纖纖初日射西樓樓上旌簾卷繡鈎數裊斷雲秦望曉  
一聲寒鴈鑑湖秋煙波憔悴西施國風月飄零范蠡舟  
莫向登臨動懷古有情多為等閒愁

蓬萊閣閒望寫懷

越絕開華國姚虞啟後昆

案州圖上虞餘姚蓋舜之後

昔聞勾允霸

今作帝王藩地得東南重山侔岳瀆尊

周官東南曰揚州其山鎮曰會稽

平湖來萬壑翠岫列千門市井魚鹽合居人組繡繁

牙旗開物表州宅倚雲根

州宅在卧龍山上

六郡趨麟節

會稽東部

提六州微之詩云會稽旁鎮六諸侯

三峯出雉垣

中有卧龍巖龜三山焉

秦游前事

廢禹畫舊書存鴈鷺來還去鯨波吐復吞菱歌秋澹遠

江信暮潮渾石古寒松偃樓危畫靄昏冷光濃可截秀

色淨無痕露媚環堤柳風飛列寺旛深林藏杞梓芳徑

雜蘭蓀巧笑花爭豔嬉遊玉闕溫畫船鷗鷺迅絳袖綺

霞翻有意皆行樂無憂可時萱鄉惟知俎豆士亦賁丘

樊巨舶聯艘至交衢百貨蕃敲冰呈巧手

越俗呼敲冰紙近為巧手

織素競交駕

繒綺最盛也

麗圃紅柑亞通畦紫芋蹲茶先春

入焙

卧龍茶冠吳越

筍帶雪黏盆

經冬食筍

異夢隨時坼清香觸處

歆吳趨慙種蠹楚些陋湘沅往事圖難盡前修孰可援

風流王與謝唱和白蕪元顧我棲儒竇胡為屬使韃迂

疎非吏法蹇淺是辭源謬覽先生策誰調伯氏墳翦裁

迷幅尺追琢昧璣璫學術何曾取名場輒屢奔

余謬擢進士第

又登技  
革科

技廿同鼯鼠化敢望溟鯤將幕閒留滯

余從事太原凡

年八鳥臺誤選掄埋輪慙避俗折檻畏當軒坎塏人奚顧

羈孤舌但捫愛書疑有癖怕事欲無言薪米支離叟蹄

孟炙轂髡一為華省吏三駕使君轡

余於今三領符竹

蹭蹬慵

成性龍鍾病愈惛因懷邸中紱來訪道山園

賀監舊宅

稅鞅

紅塵外班條碧海垠披襟澄沆漭緩帶滌潺湲樂歲歡

康洽高鬢禮讓敦

到郡適值府學方歲

南宮羅俊彥東箭藹瑤琨

退食求凋弊吹毛析滯冤庖刀怯餘刃櫛劒喜平反重

祿容虛受期民肯憚煩問賢思水薤教俗養雞豚  
西成稻逍遙北海樽史符多鶴立僚友盡鴻騫詎  
陰頌聊祛垢訟諠行歌齊擊壤坐嘯比啼援洞邃  
宜招隱時清恥叫閭聶嘯揮醉筆偃僂曝晴曦險  
齋長屐尋幽叱短轅窮通方自適語默且休論厭  
把詩筒發欣逢酒甯掀桔槔肥果茹竹馬戲兒孫  
以此為官業何由報主恩冰霜徒勵操淵谷可驚  
魂蕙帳羞逋客庭貆鄙素餐行當解簪紱歸老白  
雲村

春日登望海亭

望海亭前春色深，風光澹澹海沈沈。  
如世路來還去，山帶城蕪古到今。  
坐見微雲生別岸，吟驚幽鳥起層陰。  
勸君莫苦憑高望，驚動子牟千里心。

留題新建五雲亭

亭占卧龍

章岷

卧龍東嶺冠雲霞，亭面谿流對若耶。  
秋霽獨先初夜月，春陰見盡滿城花。  
踈篁遠檻棲寒雀，喬木依簷泊暮鴉。  
紅燭未殘賓已醉，倚風歌管到人家。

春日獨登蓬萊閣

郡閣高檐半納雲，危欄徙倚惜芳辰。  
澄潮疊嶂新經雨，啼鳥開花各為春。  
按有牋毫難賦景，席無歌管懶邀賓。  
自憐莫厭登臨數，即是葵丘代戍人。

和孔司封題蓬萊閣

沈立

拂雲高閣擬蓬萊，面向稽山鑑水開。  
文舉清尊無限樂，微之佳句不勝才。  
屢嘗雪夜凭朱檻，幾對花天醉綠杯。  
明主未容休退去，會須重乞一麾來。

同前 趙誠

龍卧山形滴翠微，  
鸞飛閣勢構空危。  
六鼇不是湖中蟄，  
一島疑從海上移。  
屏障牋毫吟詠處，  
神仙羅綺燕遊時。  
自慙為吏非香案，  
又躡雲梯從使麾。

同前 沈紳

三山對峙海中央，  
舊志蓬萊山正偶會稽高閣新題紫翠房。  
玉鉉

相君頌瑞地，  
金貂仙子挂冠鄉。  
雲隨步武鼇頭穩，  
風滿襟裾鶴背涼。  
吸盡流霞不知醉，  
直須乘月據胡牀。



同前 吳可幾

皇唐舊相元才子曾作蕃宣式燕遨郭郭上當星紀分  
軒薨全壓閭風高賓僚會集簪裾盛衙隊周環鼓吹豪  
不出公庭得仙館豈同徐福絕雲濤

同前 裴士傑

山卧龍形閣枕山簷楹高起太虛間風來宛訝鳴簫瑟  
客至宜聞振珮環暫賞已能消濁慮久居應不老朱顏  
蒼煙淥水無窮趣絕勝塵紛走世寰

同前

孫昌齡

突兀軒楹氣象豪使君攜客共遊遨坐來面揖湖山勝  
行處身騰日月高隱約壺中露蓬島分明海上涌金鰲  
宜酬絕景頻吟醉況是東南暫擁旄

同前

顧臨

萬壑千巖滿數楹當中秦望翠開屏朝遊簫吹聞仙樂  
夜散燈光墜列星聊寄蘆廬消白日何須扁舸到滄溟  
飄然賦此得真意直欲乘空御鶴翎

同前

江衍

魏據龍蟠最勝山  
神仙琳館落人間  
差差萬井庭闌布  
矗矗羣峯屏障環  
八座湖光浮蕩漾  
俯簷雲影過爛熳  
登臨自有飄然思  
便覺身同白日閒

古詩

望海亭

元稹

海亭林木何籠葱  
寒光透垓秋玲瓏  
湖山四面爭氣色  
曠望不與人間同  
一拳塤伏東武小

龜山別名

兩峯闕構秦

望雄

兩峯謂望秦秦望二山

嶽空古墓失文種

墓在州城山上圖經云潮水到山望

棺柩入海今所存古穴耳

骨兀怪石疑防風舟船駢比有宗侶水雲

滂泆無始終雪花布徧稻隴白日脚挿入秋波紅興餘

望劇酒四座歌聲舞豔煙霞中酒酣從事歌送我歌云

此樂難再逢良時年少猶欣羨使君況是白頭翁我聞

此曲深歎息唧唧不異秋草蟲憶年十五學構厦有意

蓋覆天下窮安知四十虛富貴朱紫束縛心至空粧梳

妓女上樓榭止欲歡樂微芒躬雖無趣尚慕賢聖幸有

心目知西東欲將滑甘柔藏府已被鬱噎衝喉隴君今  
勸我酒太醉醉語不復能沖融勸君莫學虛富貴不是  
賢人難變通

再題州宅

張伯玉

昔覽微之州宅篇待將屏障寫山川更看白傅明月句

欲上高樓跨紫煙

元詩曰四面常時對屏障  
白詩云月明樓閣在空虛

盤紆星斗

旁六郡零落風騷三百年喬木自存人自遠可憐香紫

舊神仙

清思堂曉雪初霽望飛來山

密雪曉初霽  
朝陽霽融融  
隱几高堂上  
坐對飛來峯  
梵塔倚天半  
樓臺出煙中  
宕然金銀闕  
瑰碧交玲瓏  
漸轉皎日高  
杳杳聞疎鐘  
天和發秀彩  
顥氣如騰虹  
況予世慮疎  
久矣澗心胷  
更臨物外趣  
愈覺萬緣空

閔山詩

并序

蔣堂

越之府山亦名卧龍為一境形勝予視事之明日見其竹樹零悴僅有半在問吏吏曰為昔人翦伐使然問民

民對如吏因悵然久之自謂非予守土即茲山殆將童矣於是申約束止樵採作閔山詩云

東南亘羣山形氣或斷續茲山窮嶄絕孤峙越之腹鬱蒼瞰城闔勝秀為民福所宜禁樵蘇主者在嚴肅不知平昔時誰氏來班錄私庖計薪爨無時伐良木官膳剗貨財彌年翦脩竹忽忽事斧斤丁丁響川谷萬葉壤密幄千竿倒寒玉輪囷無完枝檀欒鮮遺族戕賊殊未厭峯巒翠將禿鶴侶怨且驚雲容慘以惡非唯挫生意抑

乃傷雅俗王者有仁恩行葦亦沾沐嗟嗟若人者忍不思化育今予剖信符於茲憇丹轂謂山豈無靈胡為人所黷呼吏對泉石申禁護林麓庶幾養翹英勿使罹殘酷來者賢使君斯言願為復

奉陪蓬萊閣賞雪賦詩謹成二十四韻呈知府

龍圖侍郎

姚勔

一氣運轉無時停陰陽消長權相仍不有栗烈謹閉固安得生育萬化興東南之土苦妍暖大冬徃徃水不冰



有時草木自發洩百蟲不螫飛蚊蠅侍郎下車庶事飭  
威行恩煦瞻風稜宿姦竄伏善民裕衆強不敢暴興陵  
剛柔設施旣得理律呂感召還相應先春未臘已見雪  
平地一色迷溝塍寒華浩蕩失舞鶴逸勢飄突回飛鷹  
不唯盡掃氛祲息便使歲善倉箱登蓬萊高閣倚巖壁  
下見羣巒千萬層其間賦象不可數一一焜耀光彩凝  
會稽山水天下勝於此更可窮誇矜無風四面卷簾幕  
坐上衆客羅簪朋分題行酒各壯浪浩然萬慮何泓澄

抽毫沓簡公已賦欲敵妙句誰其能小生學力最卑弱  
懦氣鬱鬱唯填膺往時微之訪安道剡谿扁舟夜獨乘  
隱淪閒事至微小史筆猶為千載稱豈如公今為侍從  
器業天子之股肱擁麾一方聊撫俗瑞至應節如糾繩  
處之廟堂變天下和氣自足康黎蒸良辰樂事固可紀  
欲寫但愧才弗勝他年收拾入房策豈獨佳詒口所騰

和  
元絳

晚晚年垂盡沈氣始凝雲霄方一色霰雪忽相仍何

處茲辰好吾州自古稱稽山呈刻畫鑑水弄鮮澄佛土  
橫銀界天文露玉繩綆珠壓簾翠巖壁累臺層崑露朝  
垂木郇鹽久滿脰濃梅明庾嶺亂蝶鬧青陵舞緩來還  
轉驚多下忽騰藏崖未見眴著雷即垂冰密處情何極  
狂時力不勝奪鮮迷野鶴汗白絕樊蠅孫幌方開卷焦  
廬正曲肱悲鳴跼老驥怒擊下豪鷹顧我雖遲暮當歡  
亦彊能醉懷思日富病眼喜晨興賀帳催休吏賓筵幸  
得朋周詩誦文穆鄴酌對劉應賞為良辰樂高宜善賦

登鸛裘欣未至

司馬相如衣鸛裘

青簡使先蒸富歲還相慶陽

春各自矜醅顏均玉氣泚墨出珪稜句待呼胡續舟期

訪戴乘長謠辱君贈珍感服吾膺

和  
許安世

南國收藏晚齡天凜烈興日行黃道市神御坎宮乘元  
化初施種窮陰乍喪朋氣隨鈞外轉雲自澤中騰集霰  
紛餘凜號風助峻稜紫霄零雜珮玄野碎增冰縞色坳  
穴徧寒光上下凝候嚴知節應空曠覺神澄透隙還同

舞因方不待繩鴈飛朝愈急雞誤夕相應吟絮飄吳苑

裡茅秀楚塍堦庭迷鶴驚林麓蔽薪蒸瑤水三千里崑

崙九萬層檻前闕化國波際失西陵

白傅寄元浙東詩  
煙波起處雨點白

知是西陵  
古驛臺

舟興懷安道鱸思鄙季鷹勝遊方窄值高會

喜相仍漲海雄藩屏東侯寶股肱藥珠辭密侍阿閣賁

華稱將幕開樽俎賓筵集俊能醴杯親勸酢龍坂盡濟

登郢唱人誰繼臯謨世共矜擊轅知亂雅附驥偶同蠅

綰席塵空滿嬰衣體詎勝仰瞻雲漢麗嘉惠豈虛膺

因覽狀元節推和詩再和一首

元絳

綈簫驚年杪鈴齋戒夙興連空集雲霞撤席命賓朋  
閣盤虛出簾興選勝登山川方晦藹縞素競飛騰  
密著珠簾重低沈粉水澄迷藏秦洞穴刻鏤禹溝塍  
蓬島三番抃瑤峯四徹繩

羣玉山四徹中繩

風傳天外籟湖寫鑑中冰

銀色三千界琳臺十二層折梅思陸凱詠絮對王凝

道韞

凝之妬舞輕飄燕臨書細字蠅光凌射的鶴氣壓沃洲

鷹擢月谿翁共歌蘭楚客能瓊軒走油壁練馬頓鈎膺

澤滲陽膏動和薰氣燭蒸冬權時已正尺瑞歲將應  
叶  
鄙也同民樂油然弗自勝平時陪法從長憶奉昭陵拂  
旦開金殿鳴鞘下玉乘六花朝服滿萬歲壽觴稱就望  
堯雲日賡歌舜股肱冰醪霑飲賜竹唱聽哀矜爾後孤  
蹤遠頻年老病仍兩朝違觀魏何日見觚稜

因覽蓬萊觀雪唱和謹成二首

孫覺

重湖複嶺去連延氛靄消沈雪後天縹緲三山浮海上  
參差羣玉露峯巔使君宴集仍侵曉遷客登臨欲判年

灑落塵懷對清絕向來身世兩脩然

其二

蓬萊高閣與天同雪過欄干萬里空湖海乍驚銀漢落  
乾坤都在玉壺中扁舟漾漾思乘月病骨飄飄欲御風  
遮莫畫圖傳北闕承明人更出江東

蓬萊行

錢公輔

蓬萊謫居香案吏此語昔自微之始後人慷慨慕前芬  
高閣雄名由此起一從圯廢知幾年棟摧礎斷埋空山



遺蹤餘址杳何處惟有竹樹荒蕪間過者徘徊遊者惜  
舉頭不見谿山色寂寞無人欲問誰神仙有景真虛擲  
一興一弊固有時主人旌旆來何遲下車鉞刃得優逸  
痛此舊事幾凌夷呼工萃材若河決正值西成農隙月  
屹然大厦立層巔百尺崇基鬼神拔虹蜺截空崖險平  
一級一級煙雲生步武凌虛眉睫濕四面四面屏障迎  
時攜賓佐恣吟賞笙歌輩類文章黨迴眸眄晃相顧笑  
莫辨人間與天上觀風齧齟環翠低左右羅列如嬰兒

鑑湖浩渺稽嶺秀上下延揖生光輝秋日淒清春日媚  
冬宜飲雪夏宜醉四時風景各一全須言不是尋常地  
乃知真境未易彰神物寶護天緘藏人謀暗與鬼工合  
一日剖露如騰驤越王臺榭荒涼後唐相英靈磨滅久  
千巖萬壑幽隱處而今盡入人襟袖憑欄黯黯半斜陽  
燒煙漁火凝寒光此時撇起千里恨使人悽哽生斷腸  
隔簾依依漸明月酒氣浩蕩歌聲滑此時放出百杯歡  
使人雍容重擊節惟公獨作蓬萊主夜擁琴書雜樽俎

胃中氣焰欲干斗座上辭鋒欣捉麈嗟余時作蓬萊客  
賦詠登臨儒者職千日徒教混醉醒七言未解鏘金石  
蓬萊本在滄溟中那知平地別有官方壺圓嶠咫尺是  
願乘鵬翼長西東滿筵誰匪蓬萊賓闔境盡是蓬萊民  
人人共結蓬萊約行行醉看蓬萊春

會稽掇英總集卷一

欽定四庫全書

會稽掇英總集卷二

宋 孔延之 撰

西園

律詩

題曲水閣詩 并序 唐詢

吏部樂安公治會稽數月政清吏休庭無留事一日出  
府署西里所歷金山祠顧神而嘻知非所宜為民祀者

促吏壞去因其宇乃廣乃闢署曰正俗亭繇亭之南地  
曠宜美嬰城面湖東負于山顧瞻厥中若與意會間而  
歎曰昔晉諸賢游蘭亭修禊事實在茲土世一異絕而  
弗續今視得所嚮其疇與興乎亟命監兵李君文都仵  
來以治並山鑿渠上引湖水悍波合注如怒如奔縈流  
西行數步一折衆石回阻激為湍聲其哀泠泠洎若鳴  
玉降而北出乃匯于河即渠之南夾植文棟引梁橫度  
隱若虹起命之曰曲水閣綠山北嚮聚流為池至于正

俗亭又從而西奠渠之北考室其上曰流觴亭壓城之隅治弗而基中可以望曰茂林亭旣已事我公帥官屬集而落之絃匏相和曲奏未闋舉酒環視四阿無蔽灌木回映鳴禽互變層巖在右流水相續方其樂甚愉愉自得緬然蓋游於世俗之外而百慮不得奸焉噫川澤之尤土壤之美厝于幽閒無營於世待人然後發嚮者淫鬼宇之狂巫諛祝譁囂雜擾相與浼乎其間累世而然卒焉發而新之祛翬為寧流汙為清蕩我奧濫即于

高明徵公之來誰其經營按曲水制始永和中為盛集  
歷數百祀往而幾熄今我公修之州人忤且語曰永和  
事去吾遠誦舊志其傳亡髣髴吾何與焉已而復于今  
固吾所睹視永和烏所謂今之倖哉公樂聞其言又嘉  
其成作詩以美之監郡虞曹降及寮屬從而賦者凡二  
十一篇編次如左屬吏唐詢辱命以序辭不成飾赧然  
愧集景祐丁丑歲春三月日序

詩

蔣堂



危構跨大淵，淪清滌世紛。  
飛湍逢石轉，漱玉隔山聞。  
影亂林花落，叢幽澗草薰。  
茲為禊飲地，何羨右將軍。

同前

唐詢

依山營廢壤，結宇跨通溝。  
派引平湖遠，聲分幾曲流。  
交陰覆脩竹，照影下輕鷗。  
此日羣賢集，寧疎晉世游。

同前

林槃

勝絕千巖地，清涵一水濱。  
石泉寒繞澗，山木翠和春。  
秀入壺中望，幽疑物外身。  
賢侯足真賞，王謝有芳塵。

欽定四庫全書

卷二

同前 劉述

面勢俯巖隈，雕軒映水開。  
雲從棟間出，人自鑑中來。  
櫂楫歌聲度，漸裳禊事迴。  
東山如未起，好住小蓬萊。

同前 邵必

鑿石得春渠，波環閣勢孤。  
新痕漲微雨，遠碧注平湖。  
士俗山陰舊，風光洛曲殊。  
回眸見危嶺，憑檻有驚鳬。  
墮葉浮旋瀨，疎篁蔭疊櫺。  
人間多拾翠，魚樂半依蒲。  
河朔誰觴友，沂津昔詠儒。  
遺芬知未泯，追蓋此為娛。

諸官詩成因書二韻於後

蔣堂

一派西園曲水聲水邊終日會冠纓幾多詩筆無停綴

不似當年有罰觥

昔蘭亭賦詩不成者  
十六人各罰酒三觥

西園醉歸

張伯玉

向晚西園飲乍闌山公酩酊上輕鞍東方千騎隨車出  
南國佳人夾路看縱目漸迷山色遠迴頭猶憶水聲寒  
歸來未放賓游散更賦新題刻燭觀

淶波亭

向傳式

我愛東南郡恩容守會稽府當秦望北園枕卧龍西水  
為流觴引亭因正俗題松篁清有韻桃李密成蹊一沼  
開方鑑雙橋亘彩霓繞波平漾漾春草碧萋萋城上興  
崇構林端露半梯園枕郡城予因建樓於上以望湖山也登疑青漢近坐  
與白雲齊山色回頭是湖光照眼迷笙歌隨分有樽罍  
逐歡攜月夜宜飛蓋花時醉似泥蓬萊風景異此地好  
長棲

古詩

寄題望湖樓

蔣堂

城上危樓勢孤峙樓頭盡見湖中水  
水色澄明游者多古來雅以鑑為比  
家家畫舫日斜歸處處菱歌烟際起  
清漣蒙潤一都會碧底涵空三百里  
溥哉利及鎮東人而我常嗟馬臻死  
今茲使君多感慨所以望湖心不已  
頻登雉堞追古往盛集賓朋為宴喜  
樓南極目芙蓉花萬疊紅英照千騎

寄題西園

蔣堂

西園昔日多遊從，迴流屢泛卮酒空。前亭後亭草茵軟，  
曉景晚景烟嵐融。角巾蕭灑竹林際，屨綦來往花陰中。  
時方偃蕃適四體，不料游宦如孤蓬。數移五馬臨大屏，  
幾悵二毛成老翁。昨去鄰封亦甚適，謂守餘杭也祇限一水  
無由通。錦城此舉又遠適，流觴雅會何時同。錢塘山色  
望不見，稽山況在錢塘東。

賀監

古律詩

送賀秘監歸會稽序

并詩

唐明皇

天寶三載太子賓客賀知章鑒於止足抗歸老之疏解  
組辭榮志期入道朕以其夙存微尚年在遲暮用修掛  
冠之事俾遂赤松之遊正月五日將歸稽山遂餞東路  
乃命六卿庶尹三事大夫供帳青門寵行邁也豈惟崇  
德尚齒亦將勵俗勸人無令二疏獨光漢冊乃賦詩贈  
行凡預茲宴宜皆屬和

遺榮期入道辭老竟抽簪豈不惜賢達其如高尚心環

中得祕要方外散幽襟獨有青門餞羣公悵別深

同前 李適之

聖代全高尚玄風聞道微筵開百寮餞詔許二疏歸仙  
記題金錄朝章換羽衣悄然承睿藻行路滿光輝

同前 李林甫

挂冠知止足豈獨漢疏賢入道求真侶辭榮訪列仙  
睿文含日月宸翰動雲烟鶴駕吳鄉遠遥遥南斗邊

同前 嗣許王琬



官著朝中貴才傳海上名早年常好道晚歲更遺榮授  
錄歸三洞還車謁四明東門詔送日揮涕盡羣英

同前

褒信郡王玘

止足人高尚遺榮子獨前詣臺飛鳥日辭闕挂冠年象  
服歸丹宸霓裳降紫天仙舟望不及朝野共推賢

同前

席豫

南山四皓德東海二疏名功遂知身退心微覺道成霓  
裳明主賜鶴駕列仙迎詔餞出中野朋歡留上京灞橋

春水溢稽嶺白雲生此去三千里那堪長別情

同前 宋鼎

紫氣朝明主丹丘送老臣誰知探穴處更有散金人  
陌上神仙日城東梅柳春遙知歸隱處烟浪隔嵩塵

同前 郭虛已

白首輕軒冕黃冠重隱淪嚴陵垂釣日疏廣散金辰  
北闕辭明主東門別故人以茲敦雅俗立化盡歸真

同前 李巖

遠節忘榮趣全真悟道微登朝四皓客辭老二疏歸聖  
主欽玄德台臣餞羽衣丹丘不可接鳬舄幾時飛

同前

韋斌

抗情遺黻冕高步出氛埃橫海鴻飛遠登仙鶴語催希  
微餘第宅恍惚視嬰孩桃實三千歲何當獻壽來

同前

李慎微

有客自言狂經書仕聖唐業尊傳帝子道妙寵君王厭  
俗懷仙觀思遊憶故鄉公卿祖疏廣親戚送劉綱海上

波瀾急江干煙路長蓬萊不可見何處訪霓裳

同前

韋堅

解印辭榮祿遊真奉德音贈行天藻下錢席上台臨遠  
馭仙山鶴常懷帝里心無因同執袂相望但霓襟

同前

齊澣

君家在四明崇道復遺榮霓服辭丹禁天文詔玉京義  
方延永錫真籙授長生舉手都門外白雲江上行

同前

崔璘

軒冕朝恩盛霓裳祖帳榮倏然謝時客高步尚遺名魏  
闕駕行斷稽山鶴駕迎相期下鳬舄謁帝會承明

同前

梁涉

尚道遺朝綬從天降羽衣儲安四皓去榮足二疏歸垂  
耀珠隨轉馳軒鶴送飛輕舟鏡湖上宸翰作光輝

同前

王濬

業盛王公秩名高絳老年遺榮謝珪組得志學神仙去  
國風為馭還鄉海作田何當曳鳬舄萬里更朝天

同前

王瑞

父子承恩日遺榮拜職辰掛冠辭聖主佩印奉嚴親舉  
代稱賢智當朝勸孝仁退歸將適越攀餞乃傾秦

同前

姚鵠

若非堯運及垂衣肯許巢由脫俗機太液始同黃鶴下  
仙鄉已駕白雲歸還披舊褐辭金殿却捧玄珠向翠微  
羈束慙無仙藥分隨車空有夢魂飛

同前

王鐸

詔許真人歸舊隱為言海上憶孤峯宸庭暫別期千載  
野服飄然出九重華表尚迷丁令鶴竹陂猶認葛仙龍  
自憐弱羽塵埃重於此無由躡去蹤

同前 何千里

錫鼎昇天幾萬春裔孫今復出囂塵姓名當繫上清錄  
齒髮不知何代人暫應客星過世主旋歸吳市作遺民  
遼東駕鶴忽飛去揮手無言辭紫宸

同前 嚴都

欽定四庫全書

會稽吳興集  
卷二

十

廣成何必挂朝衣已奉玄珠佐萬機還躡舊來鳬舄去  
不將新賜鶴書歸

先生固辭寵  
祿竟追成命

暫憑風馭遊清禁終泛

仙槎出紫微今日漢庭因少別人間無限白雲飛

將離  
洛都

歷別公卿十數輩  
其處皆有白雲起

同前  
嚴向

孤雲去住本無機却指蒼梧下紫微  
錫鼎為傳仙族在  
泛槎還入海煙歸客星一夜凌光武華表  
千年送令威  
聞道葛洪丹竈畔至今霜果有金衣



同前 康健

解綬申知足歸元道益真離章垂睿作祖帳別羣臣紫  
禁辭明主青谿訪羽人賞延忠孝著榮耀故鄉春

同前 韓宗

遺老去朝行登真返舊鄉軒車成羽駕纓綬換霓裳明  
主懷江外羣公祖道傍青門有前事千載共輝光

同前 郭慎微

承明常謁帝函谷坐成仙少別商山下長探禹穴前雲

迎出關馭花待過江船欲識恩華重宸章七曜懸

同前

于休烈

飛名紫府內抗手白雲鄉道與松喬匹榮辭園綺行夫  
君旣鶴駕幼子復霓裳少別留宸藻東南歸路光

同前

齊光乂

晚歲朝真隱皇情諒不違辭家五十載今日復東歸祖  
帳臨青道天章降紫微顧嗟軒冕者誰與比光輝

同前

韋述

二疏方告老四皓盡歸山  
藹藹都門別仍看衣錦還  
霓裳標逸氣丹竈理童顏  
一遇真仙侶羣心難可攀

同前

韓偓

子綦南國隱周氏北山居  
羽客輕簪綬霓裳下里閭  
仙帆歸海近雲氣度關虛  
今日辭明主深恩寵漢疏

同前

杜昆吾

辰象降星精登朝隱吏并  
求珠謝軒冕放鳥指蓬瀛  
擲地文章逸匡儲羽翼成  
江邊丹障起雲外綠輿迎  
落落

神仙意悽悽離別情聖恩殊未已何獨厭承明

同前 張緯

北闕皇恩重東門紫氣飛為看賓客去何似買臣歸迎  
綬旋江國題輿入侍闈千年舊跡在七日故人非別涕  
霑霓服離筵著錦衣無因伴仙羽空此羨光輝

同前 陸善經

至貴不忘初辭榮返舊居霓裳因寵錫鶴駕欲凌虛丹  
禁傾三事青門祖二疏函關遇真隱應演道家書

同前 胡嘉鄩

帝鄉辭寵命羽服表華年地變君臣禮門榮父子仙鳳  
書開紫觀鶴駕待青田歸舸蓬萊近宸章日月懸跡光  
三樂美聲重二疏賢即此過函谷應留道德篇

同前 魏盈

東門桂冠處西漢祖筵開乃是黃庭老言辭丹闕來方  
稱四皓德更仰二疏才今日青谿路何時謁帝回

同前 李彥和

遺榮辭上國解印適稽山聖主留深眷羣公祖別顏綵  
帆收鑑水紫氣度函關應是遼陽鶴千年始一還

同前

張博望

紫綬朝中貴黃冠物外高孰能知止足君獨避塵勞已  
曉青霞志方從碧落遨軒車儻來物從此賤吾曹

同前

辛替否

送君青門外遠詣滄海汜鳬舄遊帝鄉羽衣飛故里術  
妙焚金鼎丹成屑瓊藥追餞會羣寮屬文降天旨秦吳

稱異域少別猶千祀黃鶴寓遼陽應明城郭是

歌

并序

盧象

先生紫陽真人闕耳河目神氣有異年八十六而道心益固時人方之赤松子去年寢疾累日冥然如夢長男曾子求於神鬼長請於天竊司命之籍與鬼物相競而角觝焉而告真人乃泠然而歸於是表請辭官乞以父子入道俱還故鄉仍以山陰舊宅為觀焉皇帝嘉尚其事尋而見許擇日度公與男田時公卿大夫觀者如堵

皆曰賢才也正月五日上令周公邵公洎百寮餞別青  
門之內玄鶴摩於紫霄吹笙擊鼓盡是仙樂聞者莫不  
增歎輕軒冕焉余與真人相知不以年不以位俱承太  
公之後見賞王粲之詞悠悠此別不覺流涕輒贈古歌  
辭一首庶為真人傳用之爾

君不見先生耳鼻有仙骨自號狂生中有物金華侍講  
三十年兒戲公卿與簪笏青門抗行謝客兒健筆連羈  
王獻之長安素絹書欲徧主人愛惜常保持每歎二疏



不足道復言四皓常枯槁去年寢疾彌數旬神鬼盈庭  
謀一老長男泣血求司命少女顰眉誦靈寶還如簡子  
復歸來更與洪崖同壽考上書北闕言授籙稅駕東州  
願修道初聞行路猶未信果達吾君謂之好山陰舊宅  
作仙壇湖上閒田種芝草鏡湖之水含杳冥會稽仙洞  
多精靈須乘赤鯉遊滄海當以羣鵝寫道經皇恩贈詩  
四十字明主賜金三十鎰供帳傾朝一送歸雙童駟馬  
從茲出迴看紫綬若輕塵遠別青門嗟故人駕鷺差池

攀羽蓋虹霓天矯翊車輪田田列侍浮丘伯曾子榮過  
朱買臣余高若是有先覺滅跡歸根從大朴千載悠悠  
等令威十洲漫漫思方朔歸去來青牛頓足少遲迴忽  
然雲霧不相見唯有飄飄香氣來

回鄉偶書

賀知章

離別家鄉歲月多近來人事半消磨唯有門前照湖水  
春風不改舊時波

其二

幼小離家老大迴鄉音難改面毛腮家童相見不相識  
却問客從何處來

經賀祕監鏡湖道士觀

朱放

已得歸鄉里逍遙一外臣那隨流水去不待鏡湖春雪  
裏登山屐林閒漉酒巾空餘道士觀誰是學仙人

送賀賓客歸越

李白

鏡湖流水漾清波狂客歸舟逸興多山陰道士如相見  
應寫黃庭換白鵝

對酒憶賀監

李白

四明有狂客風流賀季真長安一相見呼我謫仙人昔  
好杯中物今為松下塵金龜換酒處却憶淚沾巾


其二

狂客歸四明山陰道士迎敕賜鏡湖水為君臺沼榮人  
亡餘故宅空有荷花生念此杳如夢淒然傷我情

重憶

李白

欲向江東去定將誰舉杯稽山無賀老却棹酒船迴



會稽掇英總集卷二

欽定四庫全書

集部

會稽徵英總集卷五

三至五

詳校官中書

臣

張經田

助教

臣

常循覆勘

總校官庶吉士

臣

倉聖脉

校對官中書

臣

田尹衡

謄錄監生

臣

黃廷璧

欽定四庫全書

會稽掇英總集卷三

宋 孔延之 撰

山水上

鑑湖律詩

序

序之作因棹歌也欲見鑑湖事故標於此棹歌見後

蔣堂

鑑湖三百里灌田九千頃蓋東漢太守馬侯臻所興也  
迄今僅二千載民獲其利前歲中或人上言廢湖為田



朝廷既已報可郡之豪奪輩方將影援而力取之會予  
出守於此有瀕湖之民麇至於庭叩頭以請曰苟廢此  
湖誠斷民命因盡得利病飛章以復之自是無敢橫議  
者時暮春三月風恬無波居人揚舲於湖上載酒而往  
騁遊忘歸率思馬侯之惠也因為作棹歌俾斯民習之  
而歲享侯祠焉

酬微之誇鏡湖

白居易

我嗟身老歲方徂君更官高興轉孤軍門郡閣曾聞否

禹穴耶谿得到無  
酒盞省陪波  
卷白骰盆思共彩  
呼盧  
一泓鏡水誰能羨  
自有胷中萬頃湖

靈汜橋

李紳

靈汜橋邊多感傷  
水分湖派繞廻塘  
岸花前後聞幽鳥  
湖月高低怨綠楊  
能促歲華惟白髮  
巧乘風馬是春光  
何年化鶴歸華表  
却數凋零念越鄉

龜山

在鏡湖中山形如龜

李紳

一峯凝黛當明鏡  
千仞喬松倚翠屏  
秋月滿時侵鬼魄

素波搖處動龜形  
蘗深崖谷藏仙島  
新結樓臺起佛局  
不學大蛟為水怪  
等閒雷雨害生靈

東武亭

李紳

淶波春水湖光滿  
丹檻連楹碧嶂遙  
蘭鷁對飛漁棹急  
彩虹翻影海旗搖  
鬬疑班虎歸三島  
散作遊龍上九霄  
鼉鼓若雷爭勝負  
柳堤花岸萬人招

鑑湖西鳧言事

方干

慵拙幸便荒僻地  
縱聽猿鳥亦何愁  
偶斟藥酒欺梅雨

却著寒衣過麥秋。歲計有時添。橡實生涯一半在。漁舟。  
漁人若便無知已。應向此谿成白頭。

陪王大夫泛湖

方干

去去凌晨迥見星。木蘭舟穩畫橈輕。白波潭上魚龍氣。  
紅樹林中鷄犬聲。蜜炬燒殘銀漢杳。羽觴飛急玉山傾。  
此時檢點諸名士。却是漁翁無姓名。

醉題東武亭

元稹

役役閒人事。紛紛碎簿書。工夫兩衙盡。留滯七年餘。病

痛梅天發親情海岸疎因循未歸得不是戀鱸魚

秋夜宿嚴維宅

皇甫冉

昔聞玄度宅門對會稽峯君住東湖上清風繼舊踪秋  
深臨水月夜半隔山鐘世故多離別良宵詎可逢

鑑湖月夜行舟

林桀

湖光如鑑月如珪月下湖中兩槳飛鶴擎四垂冰骨爽  
夜深疑自廣寒歸

出五雲谿口將入照湖清風微雨物象可愛

蘇舜欽

谿面霏霏雨點勻  
山腰疎樹半藏雲  
輕舟無事信風去  
驚起前灘白鷺羣

經照湖方干舊居

吳遵路

磻谿垂釣者終得展其才  
何事先生隱不逢明主來  
泉聲秋雨歇  
月色夜雲開  
對此空惆悵  
吟魂早晚迴

憶秦望照湖二境

吳遵

東南山水古馳名  
合與騷人養性靈  
秋色欲歸雲轉白

潮痕不到草常青巖房避暑堪長往桂楫浮春幾度經  
何事深思無暇日宿猿崖近狎鷗汀

古詩

與崔二十一遊鏡湖寄包賀二公

孟浩然

始覽鏡湖物中流到底清不知鱸魚味但識鷗鳥情帆  
得樵風送春逢穀雨晴將探夏禹穴稍背越王城府掾  
有包子文章推賀生滄浪醉後唱因子寄同聲

東望

此詩皇祐中親題  
於湖上之樵門

王相

越山長青水長白越人長家山水國可憐客子無定宅  
一夢三年今復北浮雲縹緲抱城樓東望不見空回頭  
人間未有歸耕處早晚重來此地遊

鑑湖晚歸

張伯玉

會稽太守無事時緩帶長作漁樵嬉大航平榻引賓從  
談笑晚從湖上歸湖邊居人望簇簇湖岸花木情依依  
環峰掩靄天四垂淥水蕩漾雙紅旗城頭疊角已平西  
舩上樽酒含餘輝冷風徐引江鵠飛白雲迴首清猿啼



漁謳菱棹烟火微使人却厭千騎隨歸來樓閣上燈後  
時覺天風清滿衣

泛五雲谿遊照湖歸

吳奎

樵風漾歸舟飄然一葉輕曲岸忽超逸遠山回抱明幽  
禽淡容與荷芰相低傾野田足收穫村叟時逢迎驩言  
無物役得我游覽情日脚暮雲起湖面蓼烟生

棹歌

序見前

蔣堂

湖之水兮碧泱泱環越境兮潤吳疆蒲葦所萃兮雁鷺

羣翔朝有行  
鱸兮暮有歸  
鯢芟牧狎至  
兮漁採相望  
漑我田疇兮  
生我稻糧我  
歲穰熟兮我  
民樂康馬侯  
之功兮其誰  
敢忘蓴絲紫  
兮箭筍黃取  
其潔兮薦侯  
堂醖臠具兮  
簫鼓張日晡  
晡兮山蒼蒼  
侯之來兮雲  
飛揚隔微波  
兮潛幽光念  
山可為席兮  
湖不可荒惟  
侯之靈兮與  
流比長萬斯  
年兮福吾鄉  
樂吾生兮倘  
佯

蘭亭古詩

晉右將軍王羲之上巳日會蘭亭曲水詩

并序

王羲之

永和九年歲在癸丑暮春之初會於會稽山陰之蘭亭  
修禊事也羣賢畢至少長咸集此地有崇山峻嶺茂林  
脩竹又有清流激湍映帶左右引以為流觴曲水列坐  
其次雖無絲竹管絃之盛一觴一詠亦足以暢叙幽情  
是日也天朗氣清惠風和暢仰觀宇宙之大俯察品類  
之盛所以遊目騁懷極視聽之娛信可樂也夫人之相  
與俯仰一世或取諸懷抱晤言一室之內或因寄所託

放浪形骸之外雖趣舍萬殊靜躁不同當其欣於所遇  
暫得於已快然自足曾不知老之將至及其所之既倦  
情隨事遷感慨係之矣向之所欣俛仰之間以為陳迹  
猶不能不以之興懷况脩短隨化終期於盡古人云死  
生亦大矣豈不痛哉每覽昔人興感之由若合一契未  
嘗不臨文嗟悼不能喻之於懷固知一死生為虛誕齊  
彭殤為妄作後之視今亦由今之視昔悲夫故列叙時  
人錄所述雖世殊事異所以興懷其致一也後之覽

者亦將有感於斯文

四言

代謝鱗次忽焉以周欣此暮春和氣載柔詠彼舞雩興  
世同流乃攜齊契散懷一丘

五言

仰視碧天際俯瞰淥水濱寥閔無涯觀寓目理自陳大  
矣造化功萬殊莫不均羣籟雖參差適我無非新

四言

謝安

伊昔先子有懷春遊契茲言執寄傲林丘森森連嶺茫  
茫原疇迴霄垂霧凝泉散流

五言

相與欣嘉節率爾同褰裳薄雲羅物景微風翼輕航醇  
醪陶丹府兀若遊羲唐萬殊混一象安復覺彭殤

四言

謝萬

肆眺崇阿寓目高林青蘿翳岫脩竹冠岑谷流清響條  
鼓鳴音玄嶠吐潤霏霧成陰

欽定四庫全書

卷三

五言

司冥卷陰旗句芒舒陽旌靈液被九區光風扇鮮榮碧  
林輝翠英紅葩擢新莖翔禽撫翰遊騰鱗躍清泠

四言

孫綽

春詠登臺亦有臨流懷彼伐木肅此良儔脩林陰沼旋  
瀨縈丘穿池激湍連泛觴舟

五言

流風拂枉渚亭雲蔭九臯鷺羽吟脩竹游鱗戲瀟瀟攜

筆落雲藻微言剖纖毫時珍豈不甘忘味在聞韶

四言

徐豐之

俯揮素波仰掇芳蘭尚想嘉客希風永歎

五言

清響擬絲竹班荆對綺疏零觴飛曲津歡然朱顏舒

四言

孫統

茫茫大造萬化齊軌罔悟云同競異標旨平勃運謨黃  
綺隱凡凡我仰希期山期水



五言

地主觀山水仰尋幽人蹤  
迴沼激中逵疎竹間脩桐  
因流轉輕觴冷風飄落松  
時禽吟長澗萬籟吹連峯

四言

王彬之

丹崖竦立葩藻映林渌水揚波載浮載沈

五言

鮮葩映林薄遊鱗戲清渠  
臨川欣投釣得意豈在魚

四言

王凝之

莊浪濠津巢步頽湄冥心真寄千載同歸

五言

氤氲柔風扇熙怡和氣淳駕言興時遊逍遙映通津

四言

王肅之

在昔暇日味存林嶺今我斯遊神怡心靜

五言

嘉會欣時遊豁爾暢心神吟詠曲水瀨淥波轉素鱗

四言

王徽之

散懷山水蕭然忘羈秀薄粲穎疎松籠崖遊羽扇霄鱗  
躍清池歸目寄嘆心冥二寄

五言

先師有冥藏安用羈世羅未若保冲真齊契箕山阿

四言

袁嶠之

人亦有言意得則歡嘉賓既臻相與遊盤微音迭詠馥  
焉若蘭苟齊一致遐想揭竿

五言

四眺華林茂俯仰清川渙激泉流芳醪豁爾累心散遐  
想逸民軌遺音良可翫古人詠舞雩今也同斯嘆

一十五人一篇成

五言

却壘

溫風起東谷和氣振柔條端坐興遠想薄言遊近郊

四言

王豐之

肆眚巖岫臨泉躍趾感興魚鳥安茲幽峙

四言

華茂

林榮其鬱浪激其隈泛泛輕觴載欣載懷

四言

庾友

馳心域表寥寥遠邁理感則一冥然斯會

五言

虞說

神散宇宙內形浪濠梁津寄暢須臾歡尚想味古人

五言

魏滂

三春陶和氣萬物齊一歡明后欣時豐駕言映清淵  
疊疊德音暢蕭蕭遺世難望巖愧脫屣臨川謝揭竿

五言 謝繹

縱暢任所適  
迴波縈遊鱗  
千載同一朝  
沐浴陶清塵

五言 庾綽

仰想虛舟說  
俯嘆世上賓  
朝縈雖云樂  
夕斃理自因

五言 孫嗣

望巖懷逸許  
臨流想奇莊  
誰云真風絕  
千載挹遺芳

五言 曹茂之

時來誰不懷  
寄散山林間  
尚想方外賓  
超超有餘閒

五言

曹華平

願與達人遊解結遨濠梁狂吟任所適浪流無何鄉

五言

桓偉

主人雖無懷應物寄有尚宣尼遨沂津蕭然心神王數  
子各言志曾生發奇唱今我欣斯遊愠情亦暫暢

五言

王玄之

松竹挺巖崖幽澗激清流蕭散肆情志酣觴豁滯憂

五言

王蘊之

散豁情志暢塵纓忽以捐仰詠挹遺芳怡神味重淵

五言

王渙之

去來悠悠子披褐良足欽超迹修獨往真契齊古今

一十六人詩不成各罰酒三觥

名見前

後序

孫綽

古人以水喻性有旨哉非所以澄之則清滄之則濁耶  
故振轡於朝市則充詘之心生閒步於林野則寥落之  
意興仰瞻羲唐邈然遠矣近詠臺閣顧探增懷聊於暖



昧之中期乎瑩拂之道暮春之始楔于南澗之濱高嶺  
千尋長湖萬頃乃藉芳草鑑清流覽卉物觀魚鳥具類  
同榮資生咸暢於是和以醇醪齊以達觀快然兀矣焉  
復覺鵬鷖之二物哉耀靈促轡急景西邁樂與時去悲  
亦系之往復推移新故相換今日之迹明復陳矣原詩  
人之致興諒詠譎之有由文多不載大畧如此所賦詩  
亦裁而綴之如前四言五言焉

題吳長文得蘭亭康相墓顏魯公斷碑

王相

魯公之書既絕倫歲久更為時所珍荒壇壞塚朽崖屋  
剝落風雨埋埃塵斷碑數尺誰所得點畫入紙貌如新  
延陵公子好事者拓取持寄情相親六書篆籀數變改  
訓詁後世多失真誰初妄鑿妍與醜坐使學士勞骸筋  
堂堂魯公勇且仁出遇世難親經綸揮毫卓犖又驚俗  
豈亦以此誇常民但疑技巧有天得不必強勉方通神  
詩歌甘棠美召伯愛惜蔽芾猶思人時危忠義常恨少  
寶此勿復令埋堙

同前 王安國

魯公之忠曠世無吾愛斯人何必書九原寥寥不可詰  
筆法髣髴精神餘況公於藝自天縱一字宜用千金摹  
想當揮灑笑談際不復靳惜唯所須山砠水險勇鐫刻  
照耀楚越連秦吳百年兵火變陵谷萬里玉石埋榛蕪  
時平好事搜遺蹟窮極南北緣崎嶇耳聞目見畧已盡  
疑有斷裂留樵漁那知數尺翳塵土洗滌近出都城居  
松煤到紙覺飛動氣象磊落超鍾虞吳卿獲此喜驚坐

朝昏把翫過明珠攜來贈客客為賦爽邁遠並前賢驅  
自云感激得妙理學入勝處繇勤劬余聞書史羸蟠礴  
意匠不為形骸拘能將聲利瓦礫棄點畫應手成璠璣  
公遭亂世生死俱見危授命真丈夫俯仰兵刃猶簪裾  
毫端妍醜肯睢盱試懷局縮較精粗體勢豈暇煙雲舒  
區區技巧尚乃爾欲鳴道德宜何如嗟哉荒煙幾日月  
豪俊忽徙臨庭除由來始棄終見取鑒裁誰敢欺錙銖  
物微顯晦亦有待人生通塞無巧愚寄謝紛紛馳驚徒

真偽枉以好惡証

會稽掇英總集卷三